

## ՆՐԱՆ

Ես ուզում եմ, որ ինձ նման  
էլ չըսիրեր մեկը քեզ,  
Բայց ասեին միաբերան,  
Թե դու, իրավ, հրեշտակ ես:

5 Ես ուզում եմ, որ քո անմեղ  
Սիրտը թնդար ինձ համար,  
Եվ հավիտյան վառվեր այնտեղ  
Միայն իմ սերը բոցավառ:

Ես ուզում եմ, որ օրն ի բուն  
10 Ապշած նայեմ աչքերիդ,  
Ինձ մոռացած, կորչեմ անհուն  
Խորության մեջ հայացքիդ:

Իսկ եթե մահն այն ժամի մեջ  
Ինձ մոտենար, օ, սեր իմ,  
15 Ես կուզեի քո սիրատենչ  
Կուրծքդ լիներ ինձ շիրիմ: